



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Syria nung sorkar aser Assad pusemertem tsüingda mangatettep adok

CAF election nung tokteptsü atema CAS-i Eto nem temelaba agütsü



VOL. XXII ISSUE NO. 144 (ADOK 144)

DIMAPUR

AMUNGNÜ (SUNDAY)

METSÜREMI (MARCH) 09, 2025

₹ 5.00

Nagaland sorkari Union Home Minister dang FMR aser PAR magizükba ashitsü

Kohima, March 8, 2025 (TYO): Nagaland nungi party ajak nungi teshimtet telok ka Delhi-i oa Union Home Minister dang Free Movement Regime (FMR) aser Protected Area Regime (PAR) lemtet magizükba metetdaksütsü atema Nagaland Assembly-i Hokolbarnü lemtet ka agiogo.

Chief Minister Neiphiu Rio-i Assembly nung Indo-Myanmar Border (IMB) nung nisung senzusenbongba aziükba indang osang lemsatepba sülen iba lemtet agia liasü.

India sorkari Indo-Myanmar Border nung kilometer 10 telongtet "Border Area" nung alirtem senzusenbongtsü atema tetuyuba ka agüja liasü ta Chief Minister Rio-i ashi.

Centre-isa state sorkar dang Assam Rifles indang COBs nung entry/exit points nung police personnel ana aser health ketdangsür ana mapa lemozüksütsü tetuyuba agütsü ta paisa ashi.

Nübertem designated crossing points 43 ajanga dang senzüsü aser ibajia Assam Rifles nungi "Border Pass" angurtemi dang senzütetsü ta lateta lir. Designated points 43 nungi 9 tashi Nagaland nung lir ta CM Rio-isa ashi.

MHA-i Nagaland sorkar dang Myanmar sensotem indang border pass repringtsü aser parnoki mapang talila amongba mesüra özüng alema inyaksangshiba atema tapet mapa inyaksü mepishiogo ta Rio-isa ashi.

"Item inyakyim ajanga alemli nungi Indo-Myanmar Border nung liyonga aruba Naga nungeri tetsükdaksü ajurutsü. Iba ajanga kinungertem tsüingda tesentaktep raksatsü aser Health & education facilities atema arurtemi timtem ajurutsü" ta pai metetdaksü.

State sorkari aiben Ministry of Home Affairs dang item tebilemsü onüktem lemsatepa arur. State Cabinet-ia MHA dang IMB atsüdangba atema jembiogo aser Centre dang FMR maneni alitsü mepishitsü lemtetogo ta Rio-isa ashi.

Iba inyakyim nung village Council Authorities dendaksütsü atema cabinet-isa mepishiogo ta paisa shisem.

Iba onük ya MHA dang timi ashitsü nüngdaker anungji tekaratiba nung all-party delegation kati Union Home Minister den ajuruteptsüla. Iba teshimtet teloki Centre dang tebilemsütem lemsateptsü ta CM Rio-isa metetdaksü.

Nagaland Assembly-i Rs 24699.83 crore Budget agizükogo



Kohima, March 8, 2025 (TYO): Nagaland Assembly-i Honibarnü Rs 24699.83 crore 2025-26 state budget agizükogo.

Chief Minister, Neiphiu Rio-i Brihostibarnü budget benoka liasü. Assembly-isa Nagaland Appropriation (No. 3) Bill 2025 agizükogo.

Tan Financial year nung mapa tasen kar enoksemba rongnung lanur 5,000 nem training agütsütsü atema Skill Mission dena lir.

Maneni budget nungsa Living

Morung Initiative ajanga Naga sobalioba aser inyaksangshi akasodaksütsü aser wazüka ayutsü, Solar Power Mission ajanga energy deficit nung yaritsü, Drone Training Centre ajanga lanur nem drone technology angazükdaksütsü aser bank maliba tesemtem nung banking services tenzüksü inyakyimtem lir.

Budget nungsa state nung tarutsü lennirtem adokdaksütsü atema Chief Minister's Fellowship Program,

transportation tajungba akümtsü atema bus 40 bendenloksü aser Interstate Border Areas nung Fast-Tracking Development inyakyimtem enoka lir.

"2025-26 budget ya kangasa tajung lir aser iba ajanga tarutsü anogotem Nagaland melenshitsü" ta NLA Speaker Sharingain Longkumer-i ashi.

"Nai asen nübertem atema nendaka bilemba aser tebilemsü abenba iba budget ajanga sayur" ta pai CM Rio nem tenüngsang agütsü.

Kangpokpi nung lungkak aitertermi garitem rongdoktsü



Imphal, March 8, 2025 (Agencies): Union Home Minister Amit Shah-i Manipur nung free movement tetuyuba agütsüba magizükertemi Honibarnü Gamgiphai nung garitem rongdoktsüogo.

Manipur kübok Kangpokpi district nung lungkak aitertermi Dimapur nungi Imphal-i aoba Tata Winger passenger gari ka rongdoktsü.

Tanep 11:40 ako meta Gamgiphai anasa lungkak aitertermi gari nung mi senoktsü. Lungkak aitertermisa CRPF/CAF sepaitem anir senzüba gari ka nunga mi senoktsü ta osang ajanga ashi.

Gamgiphai aser Keithelmabi nung lungkak aitertermi National Highway 102 nung tyre ronga aser lung tulu yutsür traffic nem

timtem agüja liasü.

Union Home Minister-i Manipur nung aliba national highways nung free movement tenzüksü tetuyuba agütsüba anema Kuki-Zo kintemi lungkak aiter.

Parnoki Manipur state sasap nung Union territory balaka meshir.

Tanü Kangpokpi district nung mepetmesü adokdang nisung ka asü aser 20 yiru. Tanü nikongdang New Keithelmanbi nung alir arishi küm 32 tain Lalgouthang Singsit yirur mozü kidangi anir aodang len tom nung asü.

Gamgiphai nung security forces-i tenük amdaksüba mokozü amshia lenmang lapoktsü merangdang L Singsit yiru.

NPF-i 'One Nation, One Election' magizüker

Kohima, March 8, 2025 (TYO): Naga Peoples' Front (NPF)-i Nagaland Assembly nung 'One Nation, One Election' (ONOE) magizükba metetdaksüogo.

Assembly Zero Hour nung 'matter of urgent public importance' indang jembidang NPF MLA Achumbemo Kikon-i "One Nation One Election" magizükba indang jembi.

India ya developing Nation ka lir aser "Unity in Diversity" naroküm nguteta lir anungji ONOE ya India atema majung. ONOE ajanga India ketdangsübaren nung kongshitsü aser state balala indang tashi ajembangtsü. Constitution of India nung Article 371(A) kübok Nagaland nem maongka balaka kar agüja lir saka item ya ONOE ajanga amokbangtsü ta pai ashi.

Linük nung Lok Sabha aser State Assembly elections ajak mapang ka nung agira regional parties shilem mali akümtsü. ONOE ajanga regional agendas tashimait kümdaksütsü ta Kikon-isa ashi.

Iba ajanga India nung democratic fabric raksatsütsü aser communist-style sorkar ama "One Party Rule" asütsü ta paisa shisem.

ONOE ajanga sen tashi aser sorkar ketdangsübaren tuluba akümtsü aser iba ajanga elections

tiptema magitetsü akok, ta Kikon-i ashi.

"Election nung senotsü endokba ajanga linük rongsenketzüng nung balaka mekongshir. Overall election expenditure ji GDP nung 0.33% shi lir ta ashir aser India ama Rs. 300 lakh crore shi GDP aliba linük ka asoshi election nung sen endokbaji aika masü" ta paisa shisem.

"BJP-i kümsük asemben tashi sorkar akümtsü tashi anguba sülen ONOE atema tesüba nungi tang kanga meranga jembi. Iba ya parnoki ano küm aika yimsü sünüba ajanga lir. Congress Party-i 50s aser 60s nung yimsü asüba ama BJP-ia sünür" ta Kikon-isa ashi.

Chief Minister Neiphiu Rio-ia "One Nation, One Election" atema telangzüba agütsüdang "ONOE tangatetba ya December 2024 nung Lok Sabha nung 129th Constitutional Amendment Bill ajanga benokogo" ta ashi.

Iba bill benokba tangatetbaji elections aiben agiba ajanga senotsü aser mapang endokba ajema kümdaksütsü aser Model Code of Conduct ajanga terenlok maparen nung tetsükdaksü ajuruba ajemdaksütsü atema lir ta CM Rio-i ashi.

1951 nungi 1967 tashi India nung election ajak külemi dang

agia aru saka state assembly tem kümsük metongi loksaba ajanga mapang kasa nung magitetsüsa aküm. Taoba President Ram Nath Kovind menden ser high-level committee kati ashiba nung ajemdaker iba bill benokogo ta paisa ashi.

Ajisüaka ONOE ajanga regional politics nung kongshitsü aser 18th Lok Sabha nung bill ya agizükra May-June 2029 meta ka nungi inyakyim tenzüksü. Lok Sabha indang mezüngbuba session ji General Election ka sülen asütsü aser kümsükji May-June 2034 tashi asütsü ta CM Rio-isa ashi.

Nagaland assembly kümsük ya February-March 2028 nung tembangtsü aser taruba NLA kümsükji February-March 2033 tashi asütsü aser 16th House ji February-March 2038 tashi asütsü, ta paisa ashi.

Tang Bill benoka aliba ajanga 16th NLA indang kümsük ya May-June 2034 tashi latetsü aser iba tetezüji kümsükji ita 14-15 shi ka dang asütsü ta Rio-isa metetdaksü.

Iba Bill ya tang Joint Parliamentary Committee (JPC) kati repringshidar aser parnok January o February nung anaben tashi ajurutepa senden menogo, anungji tang iba atema jembitsüba tim masü ta CM Rio-isa ashi.

Mokokchung nung IWD amungba osang



District administration den DHEW aser Watsü Mungdang semteper D.C conference hall, Mokokchung nung 'International Women's Day' amungba mapang tongti shilem agirtem, award agizüker aser sentong nung adenertem külemi tangokba noksa nung angur. Mokokchung, 8th March, 2025

Mokokchung, 8th March

(TYO): Alima ajunga den külemi Mokokchung nunga district administration den District Hub for Empowerment of Women aser Watsü Mungdang külem sür 'International Women's Day' sentong taküm asoshi shimteta "For All Women and Girls: Rights, Equality, and Empowerment" omen dak rangloker D.C conference hall, Mokokchung nung meraketa mungogo.

Sentong nung Chuchuyimlang Baptist Arogo, Mission Director, C.

Bendangonen Jamir-i omen nung ajemdaker tanü tensa den apet tagitsü onük tajung aika bener arua tesentepertem lemsatep. Mokokchung D.C, Thsüvisie Phoji-ia mapang tatsüka agia tanü alima nung 'Kinratep (international) Tetsürtem Anogo' amungba ratet ashi.

IWD amungba den külemi atsüapong (gender) lirumedema inyakba aser lenmang balala nungi nüburtem nem service tajung agütsür tetsür par pungu – Wt. L. Bendangla Jamir (loktiliba tsütsü), Dr. Sashila Aier (kaketkeno tsütsü), Dr.

Temjenwala Ao (education tsütsü), Wt. Yatetienla (ASHA Worker) aser Wt. Chubasungla (Anganwadi Worker) shima parnok nem konang tetushi senpettsü.

Iba sentong nung Er. Neitho Thenuo EAC menden liasü. Sünkomen Baptist Arogo Associate Pastor (Youth), Tiaaküm den temoatsü meshia sarasademer sentong tenzük. Alempong-i tetsürtem tushia ken tajung ka aten aser Putuchiba Walling, Gender Specialist (DHEW)-i melepzüng o shia sentong shibanga liasü.

Changki nung Bharat ko jaano sentong agiogo



Mokokchung, 8th March

(TYO): 'Bharat Ko Jaano (Cultural Chain Yatra Programme)' ta sür sentong ka 5th March, 2025 nü Changki yimdak Jumaba Ground nung ayongzüka kaogo ta menur aruba osang ka ajanga metetdaksü. Iba sentong ya Northeast Cultural Centre (NEZCC) Dimapur, Ministry of Culture, Govt. of India aser Department of Art & Culture, Govt. of Nagaland na semteper ayongzüük.

Iba sentong nung yartsüingsanger telok – the Tai Education Initiative Cultural Troupe, Muong Phü (Assam), Changki Orija Cultural Club, Changki Watsü Telen, Dibuia Cultural Club, Waromung Tsüingsanger Telok, Govt. Primary School, Sangpongmen parnoki shilem balala agia liasü.

Iba sentong nung tetushi tesemdanger Mangkolemba Addl. D.C, Moaküzmük Tzüdir-i jembidang, Assam nungi densema iba ama asenok külemi lungjemtetsü maongka bener arutsüba asoshi NEZCC dang sentong tajung ayongba asoshi pelaba den tarutsü nunga Mangkolemba Sub-Division nung ibala sentong maneni ayongzüka akatsü mepishia

metetdaksü.

India ya linük kanga tulu, nütsüng onsara, kin aika meyoktep, sobaliba balala, oshi balala, tamangba yimsü balala, yamaji tapu aika nung meputepi liakasa iba linük meraksai litetba ya jantrateptsü aser iba asoshi nema tanga bilemer, ta pai ashi.

Iba ama sentong akaba ajanga kadi ka metetba den angazükteper, kadi ka indang sobaliba akümtsübuttsü angazükter, iba ama lungjemba ajanga India ya tashi aiter, ta pai metetdaksü. "Pei sobaliba kechi lir, ajia wazüka ayutsü tim, saka ano tangar sobalibajia akümtsübuttsü aser ka küma lungjemba shisatsüji asenok nisung shia dak alitsüla", ta paisa ayongzüük.

Tanü lanurtem aikadi sobaliba nung temulung magütsür, kasaji Assam aser India tesem balala nunga ajurua alitsü. Tanü asenok ya social media putu ka nung alir, YouTube, WhatsApp aser Instagram aser ano aika lir, asenoki mobile dak dang rangloker, ta pai ashi. Kechiba sobaliba ya tongtibang ta sürabang, asenok indang taoba süiren/putipuin otsü metetra asenok tejakleni otertsü, lia aruba otsüji amatokra yangji

tebilemtsü aika lir, asen sobaliba ya küm talangka bentshia aruba ka asünung iba nungji asenok nema atangtsüla, ta paisa shisem.

Koba sobaliba nung südir süaka, rarateptsü asoshibo shingia mesayui alitsü ta bilemer, putepa alitsü sobaliba dang sayua alitsü. Anungji, ibaji angatetsüla aser yamaji pei yim, pei district, pei state aser pei linük ajungtsü asoshi bilema inyaksü merangtsüla, ta pai ajungshia liasü. India rangben ajungtsübaaji lungjema ali nung dang ataloktsü aser tanü akaba sobaliba sentong ya-a iba nungji shilem ka lir, ta paisa metetdaksü.

Bharat Ko Jaano (cultural chain yatra programme) ya talisa tezü nung aliba tesem shirnok maongka kangabo mangur, item pur nem maongka lapokja kadi ka sobaliba tsütsü angazükteptsü nükjidong nung ayongba sentong ka lir.

Iba sentong nung Teisovikuolie Therie, Deputy Director Art & Culture, Govt. of Nagaland; Imyaba Ao, District Cultural Officer Mokokchung; VCC Changki aser tangartemia shilem balala agia liasü.

DGP Nagaland-i show cause notice agütsü

Dimapur, Metsüremi/March

8 (TYO): Office of the Director General of Police, Nagaland-i, Thangneo Haolai'er jabaso Office Peon, PHQ Obed Haolai shiba Medziphema, Chumoukedima nung inyaker pa office-i arutsü jaoka March 7 nü osang ka agütsüogo.

Obed Haolai ya ketdangsürtem dang nungi leave mesüra temelaba kecha magi-i 23-05-2024 nungi mapai maruba ngutetogo. Departmental bushisüngdang atema maruba

aser 27-09-2024 nü pa nem osang agütsüba atema telangzüba magütsüba ya conduct rules aser temzüng özüng alema lir.

Anungji Deputy General of Police-i, Obed Haolai dang iba osang agütsüba sülen anogo 15 tsüngda telangzüba agütsütsü tetuyuba agütsüogo. Atakzüka aliba mapang tsüngda tetuyuba sülen manidakra osang talila magütsü Obed Haolai ya mapa nungi agintsü ta metetdaksüogo.

Niuland, Tuensang & Atoizu nung IWD mungogo



Dimapur, Metsüremi/March

8 (TYO): Alima ajunga den külemi Niuland nunga March 8 nü International Women's Day mungogo. Beti Bachao Beti Padhao (BBBP), Niuland District Administration, aser DHEW Niuland nungeri ayongzüka "Accelerate Change" omen nung ajemdaker iba sentong ya DC Conference Hall, Niuland nung agiogo.

Sentong nung Extra Assistant Commissioner, Kelengunuo Solo-i, tetsürtem empowerment aser environmental sustainability dak ajemdaker jemi. Laisa, Mission Shakti aser BBBP indang rasa ashi aser temelenshi bener arutsü atema teka amteper inyaksü lokti ayongzüka liasü.

Iba sentong ya Data Entry operator Ilolika lenisüba nung agi aser Accounts Assistant Merryka-i sarasademba sülen Gender Specialist Tunato Zhimo-i lokti pela agizükba o jembia liasü. Sentong nunga Gender specialist S Diketo Jimomi-i tepela o jembia liasü.

Sentong nung kiyong, yimtsüng balala nungi tetsürtem, Sumi Totimi Loka Niuland nungi lenirtem, kiyong balala lenirtem, District Administration, DHEW Niuland, aser BBBP nungi ketdangsürtemi shilem agia liasü.

Tuensang nunga Honibarnü CKS Hall, Tuensang nung International Women's Day mungogo. Iba sentong ya Mission Shakti Tuensang aser Changsao Thangjam Setshang na longjemer "For all Women and Girls: Rights. Equality. Empowerment" omen nung ajemdaker agia liasü.

Sentong nung Deputy Commissioner & Chairperson Mission Shakti Tuensang, Lithrongla Tongpi Rutsa alakteta jaoker liasü.

Sentong nung o jembiba mapang DC-i, sentong nung tetsürtem aikati shilem agiba atema kanga pelaba lemsatepba den Naga nunger lokti nung tetsürtem nem education aser employment nung kasa maongka agütsür saka yimden yimsüsuba

nung shilem kangabo magidaksür, ta ashi. Laisa, sentepa aliba lokti dang education luyim nung tebur aser tetsür tsüngda tebendang kecha madokdaksütsü mepeshiba den district nung aliba tetsürtem aika takok tajung anguba entrepreneurs, business women aser aluyimertem lir ta ashi.

Tetsürtem ya kibong nung tongtirtet lir aser la ya Tsüngrem tsüsuba, temulung lemtetba aser tagidak akaba tetsür ka asütsüla ta lai shisem.

DC-isa, village Council ajak dang Village Development Board nung tetsür nem shilem 25 bosa agütsütsü mepeshi. Laisa, district nung tetsürtem terenlok asoshi Mission Shakti amshitsü ajungshia liasü.

Maneni District Administration aser District Hub for Empowerment of Women (DHEW), Zunheboto na longjemer March 8 nü DBs Hall, Atoizu nung International Women's Day mungogo. Iba sentong ya "For ALL Women and Girls: Rights. Equality. Empowerment" omen nung ajemdaker munga liasü.

Sentong nung o jembiba mapang STL, Atoizu Unit tir Suzin Awomi-i, lokti nung tetsürtem shilem koda tongtibang iba indang lemsatepba den tetsür aser tebur tsüngda tebendang kecha malitsü atema maneni meranga inyaksü nungdakba lemsatepa liasü.

Sentong nung Atoizu Town Council Councilor Vinus Awomi-i, lokti dang tetsürtem nem tashi talila agütsütsü atema parnok nongita yaritsü ajungshi.

Kasa sentong nung Beti Bachao Beti Padhao (BBBP) tenteter küm 10 ajungba sentonga agi, koba SUAT tir Niloni Shohe lenisüba nung agia liasü.

Sentong ya Atoizu Town Baptist Church (SBAK Aizuto) Women Leader Avikali Wokha-i sarasademer tenzük aser Extra Assistant Commissioner, Atoizu Dr. Samuel Akho Konyak P, NCS-i lokti pela agizükba o jembia liasü.



March 08, 2025 nü Gujarat kübok Navsari nung terenlok mapa balala tenzüksüba sentong ka nung Ato kilonser, Narendra Modi nem sempet ka agütsüba noksa nung angur.

Tir Murmu, Modi aser Rahul hungeri Women's Day salem lemsatep

New Delhi, Metsüremi/ March 08 (Agencies): March 08, 2025 nü International Women's Day anogomong nung linük Tir Droupadi Murmu, Ato kilonser Narendra Modi, Lok Sabha nung opposition lenir Rahul Gandhi aser Union Home Minister Amit Shah hungeri tetsürtem den salem osang lemsatep.

Iba anogomong nung Tir Murmu-i X ajanga atsuapong kasa züngshitsü aser tetsürtem nem tashi agütsütsü atema ayongzü.

Murmu-i X ajanga, "International Women's Day anogomong nung ajak den salem lemsateper! Tanü asenoki tetsürtemi inyaktetba aser shilem agiba atema benjungteper. Onokisa tetsürtem temeden balala, tetsürtem kasa züngshitsü aser tashi agütsütsü atema taliba meranga inyaksü lemteter. Asen aianutem aser jalatemi alakteta inyaktetdar. Tetsürtem

pusemtsü aser lenla balala nung parnok ajemokdang asenoki tetsürtem nungittsü atema tenangzüka agidi. Asenok longjemer atsuapong kasa züngshiba, shinga mezügdokba aser tetsürtemi kecha tetsüba makai pei nükjiding ataloktsü atema inyaktetba lima ka asenoki yangardi," ta lemsatep.

Ato kilonser Narendra Modi-ia tetsürtem tashi aser tetsürtemi inyaktetba mapa balala atema akhüm agütsü.

Ato kilonserisa Gujarat kübok Navsari nung Lakhpatri Didis den sensaksema liasü.

"#WomensDay anogomong nung onoki tetsürtem tashi atema akhüm agütsür! Tetsürtem nem tashi agütsütsü aser onok schemes aser programmes balala nung tetsürtem züngoktsü atema ozü sorkari maneni inyaker. Nangzüka ama tanü kü indang social media sabang balala ajakji lenla balala nung alakteta inyaker tetsürtemi

ketdangtsü," ta Ato kilonseri metetdaksü.

Lok Sabha nung opposition lenir, Rahul Gandhi-i X ajanga, "Tetsürtem ya asen loktiliba atema tongtoret lir. Parnok dak aliba tashi, taremzü aser parnok ola ajanga asen linük tarutsü jenjang yanglushir. Tanü iba International Women's Day anogomong nung ni nenok den nokdaker aser nenok atema nokdaker. Tetsür ajak pei tarutsü tia yangertsü, nükjiding balala arishitsü aser temaba jenjang matong tashi nenok nungittsü," ta metetdaksü.

Union home minister Amit Shah-i X ajanga, "International Women's Day anogomong nung salem lemsateper. Putu aika tetsürtem tashi ajanga asen linük tejakleni aniogo. Modi indang mangdang ajanga linük yangerba nung tetsürtem tiyongtsü kümstür. Iba anogomong ajanga maneni jenjang tajung alangtetsü atema ano tashi itshitsü ajungmesodakjang," ta lemsatep.

Delhi nung tetsürtemi bank account nung sen ait atadar: Atishi

New Delhi, Metsüremi/ March 08 (Agencies): Taoba mapang Delhi Chief Minister aser tang Delhi Assembly nung opposition lenir, Atishi-i social media platform X nung video ka ajanga, Delhi nung alir tetsürtemi Mahila Samridhi Scheme kübok parnok bank account nung sen 2,500 ait atadar, ta metetdaksü.

Delhi Assembly election atema nüboyimba mapang nung Bhartiya Janta Party (BJP) manifesto nung Delhi nung tetsür shia nem ita shia sen 2,500 teyari agütsütsü, ta sangdonga liasü.

Honibarnü Atishi-i X ajanga, "Election nüboyimba mapang nung Ato kilonser Narendra Modi-i March 8 tashi nungbo tetsür ajak nem sen 2,500 agütsütsü nangzüka liasü. Tang tashi senji mangur," ta metetdaksü.

International Women's Day salem lemsatepa AAP lenir, Atishi-i, "Tanü Delhi nung tetsür

ajaki pei meyong bank account nung sen aitba message ata-a pei phone repranga alitsüa akok," ta metetdaksü.

Laisa, "Ato kilonser Modi-i pai nangzüka ataloktsütsü, aser iba ya tiyazü tenangzüka dangbo masütsü ta ni imlar," ta metetdaksü.

Honibarnü BJP national Tir, JP Nadda-i, Mahila Samridhi Scheme agizüka tetsürtem nem sen 2,500 agütsütsü atema Delhi Cabinet-i sen crore 5,100 lemsütsügo, ta metetdaksü.

'Mahila Samridhi Yojana' agizüka dak sendakba nung osangbenertem den jembidang AAP otongdar, Priyanka Kakkar-ia, "Tanü anogo kecha mesangdong. March 8 nü tetsürtem nem sen 2500 agütsütsü ta tamalen nangzüka liasü, ajisüaka tanü iba scheme atema dang sangdong agütsü. Tangbo iba atemaji telatetbatem alitsü, ajisüaka vote meshiba mapang nungbo telatetbatemji memetetdaksü," ta aitsü.



March 08, 2025 nü International Women's Day anogomong nung Chennai nung Tamil Nadu Chief Minister, MK Stalin-i pink autos tenzüksüdang tangokba noksa nung angur.

India aser Mauritius nati tezüngzüktepaika agütsü

New Delhi, March 08 (Agencies): Ato kilonser Narendra Modi-i anogo ananü Mauritius semdangba mapang nung India aser Mauritius nati capacity building, shishilembaba aser ochimashi anema inyaksü atema tezüngzüktep aika agütsü.

Mauritius national-day anogomong nung tongti tejaokerji Modi lir.

Ato kilonseri Mauritius semdangba ajanga linük ana tsüngda tesendaktep tajungba akümtsü. Mauritius atema shishilembaba partner tulutibaji India lir.

Ato kilonser Modi-i March 12 nü Mauritius semdangtsü aser asetkong linük national-day sentong nung tongti tejaoker ama adentsü.

Osangbenertem den jembidang Foreign Secretary Vikram Misri-i, Ato kilonseri semdangba mapang nung linük anati capacity building, shishilembaba, arrtsü adena senotsü dak sendakba ozüng alema inyakba mapatem nokdangtsü aser small & medium enterprises ajungkettsütsü atema tezüngzütep aika agütsü, ta metetdaksü.

Ato kilonseri semdangba

ajanga linük anati tesendaktep jenjang asadantetsü aser tarutsü nunga maneni amalitepa inyaksü atema jembishinütsü, ta pai metetdaksü.

Mauritius ya tzyimlen India kidanger ka lir, ta shia Misri-i, asetkong linük atema India ya terenlok tsütsü partner tajung ka lir; talisa tesüba küm 10 tsüngda linük ana tsüngda tesendaktep tali tashitaitba kümogo, ta metetdaksü.

Mauritius national day sentong nungji India nungia sepaitem contingent kati shilem agütsü, aser Indian Navy indang raraba rong ka amshia shilem agütsü.

Nütsüng lakh 12 aliba Mauritius nung nütsüng shilem 70 jungnüabo Indian-origin nisungtem lir. 2005 küm nungi Mauritius atema India ya shishilembaba partner tulutibatem rongnung ka lir.

Financial year 2022-2023 nung India-i Mauritius dang osettsüset/chiyungtsü ayokbaji dollar sen million 462 jenjang liasü aser Mauritius-i India dang ayokbaji dollar sen million 91 jenjang liasü.

Tesüba küm 17 tsüngda linük ana tsüngda shishilembaba shilem 132 agi teimba kümogo.

West Bank nungi India nunger 10 Israel-i anir aruogo: MEA

New Delhi, Metsüremi/ March 08 (Agencies): India nunger aayangertem nisung ter samaa liasü, ajisüaka parnok ajak West Bank nung lia nguteta Israel-i anir aruogo, ta Ministry of External Affairs (MEA)-i sangdong ka ajanga metetdaksü.

MEA otongdar, Randhir Jaiswal-i, Israel nunger ketdangsertemi samaba India nunger mapa inyakeritemji

bushia liasü, ta metetdaksü.

Osangbenertem senden nung tasügdangba ka langzüdang Jaiswal-i, "Parnok West Bank nung nguteta liasü aser Israel-i meyipa anir aruogo. Parok komaser West Bank-i aoar ibaji bushisügdangdar," ta metetdaksü.

Jaiswal-isa, Israel nung aliba Indian embassy nungi ketdangsertemi iba dak

sendakba nung Israel ketdangsertem den tongtepratepdar, ta metetdaksü.

"Item India nunger kümzüka alitsü atema Indian embassy-i Israel ketdangsertem den tongtepratepa inyakdar. West Bank-i aoer India nunger 10 pronglaji Israel-i meyipa anir aruogo aser parnok junga anepaludar," ta paisa metetdaksü.



March 08, 2025 nü Chikmagalur nung BJP lenir, N Ravikumar leniba nung party nung inyakeritemi Karnataka sorkar anema longkak aitba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, MARCH (METSÜREMI) 09, 2025

Yisui sarasademtsür

Khristan taküm ka nung teti tatidang lir. Aji oda, Khristan taküm kaji temalen sang aser telonglen tatidang agi meketbanga lir ta asenoki ken nung atener. Yisu taküm alidang pa nütüsung rongnung Pai Peter dang kanga meim. Kenü anogo Pai Peter dang ashi, 'Simon, Simon, ajiang, Satani tsük ama sepdoktsü asoshi na agitsü mepishir, saka nü tamang tamakok mangutsü asosh ni na asoshi sarasademtsür, anungji na kodang tanaben temulung meya arudir, idangji nü adianutem tashi itdakjang." Luke 22: 31 nung iba tatalokba ya asenoki angutsü. Yisu kangkidong nung metatsü asoshi mapang nenjunga arur ta Pai meteta dang liasü. Yisui pa kodang, kong shibai ashioktsütsü aser koma timtema reshikangshi ajurutsü, Pai meteta dang liasü. Iba ama shisabolu mapang nunga Pai Peter tamang nung akangshidaksü. Peteri taonung mesüra asüng parnok dak kechi ataloktsü memeteti liasü, saka pa Kibuba Yisuiibo Satani pa atidangtsü aser pa yangji tsüktsü ta meteta dang liasü. Iba jagi pai Peter dang Satani na atidangtsü asüngdang, anungji kümdanga saksalema liang, maneni sarasademang aser na kodang tatidang nung tsükdir, idangjisa ano na temulung meyipa arua nür medemer aser adianu tamang nung tashi itshidakjang ta lendong aser tatidang agi parnok tonga marudang shiadoker liasü. Na atidangtsü Satan renema lir saka na tamakok mangutsü asoshi aser teti taküm mesamatsü atema ni tebu dang sarasademtsür ta Yisui Peter dang ashiba o ji asenok atema tanüa tashi tasen angudak aser tejenokdak tajung ka lir. Peteri pa atidangtsü Satani renembajia memetet aser pa tamakok maludaktsütsü atema Yisui pa asoshi sarasademtsübaji pai memeteti liasü. Asenok Khristan takümji yamaji lir. Khristan-temji asenok lir aser Satan mapaji asenok atidangtsü aser asenok mashileni anisatsüba lir. Ajisüaka, asenok tasü aittsü aser temulung alemduk ka lir, aji Yisui teti asenok atema tebu dang sarasademtsür ta asenoki bilemtettsüla. Tatidangji temenen masü saka tatidang nung tsüker temulung meyipa marutetbajang temenen asütsü. Yisui Peter dang ashibaji jungjunga bilemdangra, Satan ajanga pa dangi tatidang arubaji pa tamang nung akangshitsü aser par adianu tashi itshidaktsütsü asoshi liasü. Aji oda, kodang Peter tatidang nung tsüker külen pai asüktema jepa temulung meyip, iba sülenbo pai Kibuba Yisu dang nangzükba ama Yisu asoshi pa taküm agütsütsüa metsübu aküm. Aiben asenoki taküm nung tatidanga asenok dangi dang arur aser asenoki dang ajurur ama bilemer. Asenoki aiben tatidang nung tsükba joko kodanga mesaktettsüsa maksü ajuru ama bilemer. Iba jagi, asenoki temulung memeyiper. Itemji satani tsüksü ama sepdokba purtem lir. Ajisüaka, Yisuiibo nai ajurutsüba tatidangji nai majurudangi meteta dang lir aser iba tatidang nung tamakok mangutsü asoshi Pai Peter atema sarasademtsüba ama na atema sarasademtsür. Aji oda 1 Korint 10: 13 nung ashir, nai mekoktettsüsa tatidang marudaktsütsü aser tatidang nungi jenbutü lenmang renemtsütsü. Iba dang nungi teyari tuluba kong nungi arutsü asenoki imlar. Kodang tatidang arur, asenok atemabo ajungbena asütsüa akok saka ibaji aseni majurudang iba tatidangji akoktsü atema Yisui na asoshi sarasademtsüogo ta nai bilemang. Rom 8:34 nung ashir, "Yisui asenok asoshi mepishitsür." Ajisüaka, Yisui mepishitsüba ajanga asenok tatidang madak takok angubaji tatembang masü, saka Tsüngremer nükjidong ka lir, aji asenoki asen adianu tashi itshidaktsütsüla. Tetezü asenok tebok sünga alibaji teperi masü, asenoki anguba takokji tatem masü aser asenok temulung meyipbaji asen kija anisüngzüka alitsü asoshi masü, saka asenoki anguba takok aser temoatsü jagi tangar tashi itshidaktsütsü asoshi lir. Yisui asen atema sarasademtsübaji ibaji atema lir. Ibaji mamadokli.

OLEMSABANG

ALUASER SHISHIDAK REVIVAL AJANGA TEMELENSHI - MATHI 13:44-46

~ Wati Longchar (Eralibill)

(Yashi adok nungi...)

Tanabuba o-entepbaji shishilemba dak (market place) amshia angur - kechi shiner? Shishidak ya tajangzük, sen aser takar kümstü merangba jaka ka. Shishidak shirnoki arakmoka ayu parnokji kanga takar aküm. Tayoker aser talir na pronglai ashioktsütsü meranger, tashiyim amshir, aser tajangzük asoshi mapa tamajung inyakdak jaka ka lir. Shishidakji nisung tajung, tamajung, yi jemer, tamachitsü mozü achir/tayoker, teküp ayoker/talir, rakzükraakter, auuyar, shilu balala, tamanger telok balala, oshi balala jembir ajak alir. Shishidakji pei ajungtsü dang asaa, sen sen dang bushia maparen ajak inyakra kotak yimli majangzükettsü ta ashir. Maneni Yisui lokti yanglushitsü indang sayur ta metetdi.

Tanü alu tetezü na/ner kibong mesütsü kechi mapa inyaker iba dangji ajar ta angatetdi. Ibai office, arogo, aser tanga mapa balala aika ta metetdi. Shishidak tetezü meimchir ajak meyoktepa alidak kong shishilemba aser rongsen bushiba leman maparen balala inyakdak ta angatetdi. Yangji ochi inyakba ajangarevival adokdakjang ta shir. Alu aser shishidakji Khristan kulisüba lushi/kimong ta sayur.

Lokti Yanglushiba Tenyaba Mapa

Lokti yanglushitsü asoshi putu balala nung arogoi tenyaba mapa balala inyakba angur. 18th aser 19th century putu, temesung nungeri alima balala dangi oa arogo tenzüka aoba den Roman Catholic aser Protestant arogo anapronglai education, charity aser medicalmission inyakba angur. Missionary karibo lokti tememen anema, tat. agi, William Careyi sati practice (kinungbu asüdag kinungtsü rongseta südaktsüba), aser Clerk-ia alar ayuba, tekolak bushiba, tetsür züngdokba, ano aika, anema tai ta ashi aser temelenshi asoshi inyak. Ano Protestant missionarytemi Laishiba ajak nem züngdaktsütsü asoshi Laishiba pei tetsü oshi nung meyip, osep (dictionary) zülü. Arogo kari industrial mission tenzük, kari yimtsüng nung alir rongsen jenjang nung ajungkettsü atema aluyimba mission tenzük. Tanülokti yanglushitsü asoshi arogotemi yamala mesükba tenyaba mapa balala inyakdagi. Tsüngrem tenung sangdi.

Temalen YSS nung China nungeri alima meimchir shia Laishiba züngdaktsütsünükjidong nung Amity Printing Press tenzüka lemsatepogo. 1988 nungi April 30, 2024 tashi nung Laishiba 260,910,073 oshi 229 nung, country 158 asoshi menünogo. China mission nukjidong kaji Laishiba ajanga meimchir lungjemdaktsütsü, Yisu Khrista Osangtajung meimchir ajak nemzüngdaktsütsü nukjidong ta ashi. Ano parnoki lanur addiction balala (mozü, yi, mobile, etc) nungi jenbua lidaktsütsü, saisapong ajanga nungtoko kümdaktsüba den rongsen jenjang tajungba kümdaktsütsü, aser China saipong ajanga alimai tali metetdaktsütsü asoshi ping-pong, bikmenten (Aor olasü nung), "Amity Cup" tenzük. Tanü alima aika nungi arua shilem agir aser iba mapang lanurtem aika dang Khrista Osangtajung sayur. Lanurtem taküm melenshidaktsüba aser China saisapong nung nungtoko kümdaktsüba mapa tajung ngua Chinese Government-i teyari tulu agütsür aser Govt. aser arogo tesendaktep tali adokdaktsür ta ashi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Merangkong BaptistArogo nung Intl' Women's DayAmong




Mokokchung, Metsüremi/ March 08 (TYO): Merangkong Baptist Arogo Women Ministry-i ayonga March 8, 2025 anogo nung "Teinyaktetba Ulushitsü Aramesaong," omen nung ajemdaker Arogo nung International Women's Day sentong agiogo, ta Merangkong Baptist Arogo Women Ministry nung Secretary, Mrs. Tolamenla-i sangdong ka ajanga

metetdaksü. Iba sentong men nung ajemdaker ken, jilushi aser choreography agi telok ayongzüikba den Ms. Imsümenla Lemtur, Asso. Pastor Women-i omen nung ajemdaker O jembia liasü. La ajanga tetsürtemi tesüiba mapang nungi takok ngua aruba bilemteta, ano tetsürtem asoshi sabang balala nung

tebilemtsütem aser tarütsü asoshi teinyaktsü tayongzüikba agüja tetsürtem ajak temoatsü ngua agiogo. Iba sentong ajanga tetsürtem ajak saaksalema alitsü aser teinyaktetba ulushitsü aramesotsü angazüker, Tsüngrem dang nungi temoatsü aser tashi meshia sarasadema sentong tembang, ta kasa sangdong ajanga lemsatep.

Purdue University nung kaketshir 2000 dak temai Khrista agizük



UniteUS sentong nung tangokba noksa nung angur.

March 08, 2025: Tang US nung aliba University campus balala nung UniteUS sentong agia college azünger kaketshirtem aikati Yisu Khrista nem taküm bendanga agütsür; yamaji Bodhbar aonung Purdue University nung ayongzüikba UniteUS sentong nunga kaketshir 4,500 aden aser aikati Khrista nem taküm bendanga agütsü. UniteUS tentetsang, Tonya Prewett-i, "Purdue University nung Tsüngrem tenüng ajungkettsüogo!!" ta metetdaksü. Sentong tembang tashi nungbo nisung 2,000 dak temai Khrista nem taküm bendanga agütsü aser noklang aika baptia liasü. UniteUS sentong ayongzükertemi Instagram ajanga, "Onok campus telungi aiba mapang nungi onoki 'taonung Tsüngremi

mapa inyaktsü' ta onoki meteta liasü. Elliott Hall of Music nung kaketshir 4,500 adenshi aser kaketshirtemi Tsüngrem külemba meteta onok pelaa liasü. Iba sentong nung adener shilem 50 dak temai sabangleni oa Khrista nem pei taküm bendanga agütsü," ta metetdaksü. UniteUS ministry yagi US tesem balala nung aliba college campuses nung evangelistic sentongtem ayongzüka agir. Taküm mezüng University of Kentucky nung aliba Rupp Arena nung ayongzüikba UniteUS sentong nung kaketshir 8,000 dak tali aden. Iba sülen Ohio State revival sentong nung kaketshir 6,500 dak tali aden aser 2000-i Khrista nem taküm bendanga agütsü. Item outreach sentongtem nung Prewett den Pastor Jonathan Pokluda aser IF:Gathering tentetla, Jennie Allen nati

yaritepa arudar. Tamalen interview ka nung jembidang Pokluda-i, kaketshirtem aikati tesüiba mapang parnok aibelenba balala atema tatok meshitsü asoshi item sentong nung arua adener, ta metetdakja liasü. P o k l u d a - i s a , "Kakethirtem aikati maaksü bener arur. Nüktapangta ajanga menatepba tashidak balala, tanur benloker mesüra tanur raksar arur. Parnok menen ajak alangzüktsü atema Yisu Khrista dang lir, ta onoki parnok den lemsateper," ta metetdakja liasü. Taruba UniteUS outreach sentongji March 11 nü West Virginia University nung agitsü. 2023 küm September ita nungi tenzüka tang tashi nung UniteUS ministry-i college campus tem nung ayongzüikba sentong balala nung kaketshir 100,000 dak tali denogo.

ANO GO ABEN TSÜNGREM DEN

TEMOATSÜ SENMANG

Aser tebu Dawid menden nung Solomon amen aser pa yimli kanga ulua yanglu. 1 Chubatem 2:12 Dawidi pa asütsü anogo tonga aru nung pei jabaso agi, anungji na tashi itang, aser ne sasa nisung ka Solomon dang sayu o ashi, "Ni alima ajak yimya lenmang sayuang." 1 Chubatem 2:2. Dawidi KIBUBA Tsüngrem Tsüngremer tzüzüng ozüng telatet nung teti alitsi aser kodanga mesentoktsü pa lenmang nung jajatsü aser ochiba vimsü asütsü nungloka yutsür pa asü. Solomon tebu chuba menden nung amen, aser pai Tsüngrem meshi. Tsüngremi shisatsü moats?, aser chuba yimli mulungba ama yimsü asü. Pai Tsüngrem dang shisats ulushia aküm aser Solomon shisa akaba ama meimchin tanü tashi madoksar ta jembir. Tsüngremi pa nem shise moatsüba ajanga ali rongsen nung takar aküm aser pa kanga jenjang tajung nung ajungket. Tsüngremer shisatsü kecha dena metemdangtsü makok Tsüngremi shisatsü dang bushira ta asüdang asen temaha jenjang nung ajungketer alir. Tsüngremer shisatsü anguts asoshi Tsüngrem den asen tesentaktep tajung alitsü kanga tenüngdaksü. Asenoki asen nüngdak shira pai asen tempeshiba aser asüngdangba dang nungi tali moatsür. Saka aseni koda meshir, asen tamang koda lir, reprangshitsü kanga tongtibang. Ajangla item indang asenoki kechi ashitsü? Tsüngremji asenok asoshi lira asenok anema shiba ali? Rom 8:31. Tsüngremi tetenzük nungi tatem tashi mechiokba temoatsü senmang agütsür. Tsüngrem den asenok pai moatsütsüsa pa taochi nung lidi ta ayongzüker. Amen.

Pakistan nung Khristan ka kou ongdoktsür maaksüa anir jaja

March 08, 2025: Pakistan nung ali kiburtemi aayanger Khristan ka apuba sülen kou ongdoktsü, tejak nung ponak teptsü aser katu ka nung mendaktsür yimdong süa maaksüa anir jaja, ta osang ka ajanga metetdaksü. Muslim nütsüng teimba aliba Pakistan linük nung Khristantemi aiben legal teyari mangur, ajioda Wasif George-ia legal teyari mangutsüa akok. Pakistan nung Punjab province kübok Faisalabad district nung aliba Chak 110-GB Chak Jhumra yimdak February 27 nü arrshi küm 34 Khristan, Wasif George süng akoi oa aliba mapang nung Muslim nunger teneti pa dak azük. George adianu, Patras George-i, "Pai aibeleni lira ali kiburtemi pa apuba sülen ozüng kübok pa anema ken o benoktsüla, ajisüaka parnoki iba maongka agia yimdak Khristantem tsübudaktsütsü atema inyak," ta metetdaksü. Wasif George aayangi ao aser nikongdang kidangi shilangba sülen tetsüi pa dang sorochoktsü atema süng akoi oang ta ashi. Pai süng mauya saka süngsang tilateri dang bendena liasü, ajisüaka pai süng auya, ta pa nem tai tonglokja Junaid Javed, Tetar Ul Haq, Jahanzeb Javed aser Naeem Saleem nunger densema Muslim nunger nisung teneti pa dak azük, ta Patras George-i ashi. "Parnoki pa Junaid Javed'er an farm-i anir aoba sülen azük. Parnokisa kou aser bangsemo ongdoktsü, tejak nung ponak teptsü aser katu ka nung mendaktsür yimdong süa anir jaja," ta Patras George-i metetdaksü. "Kü adianu dak mejungi beshibaji yimdaklir ajaki kulisüa nguogo, ajisüaka ibaji nokdangtsü atema shingaia tasümaït," ta paisa metetdaksü.

Wasif George

Parnokisa item ajakji video tangoka liasü saka shingaia ibaji menokdang. Patras George-i, "Yimjak nung mezüngmeshia maaksütsüba agi Wasif-i soseta süner," ta ashi. "Tesülen iba tesem jagi police aru aser aibelenertem ki mita ao, ajisüaka kou ongdoktsüsang aser an farm kibur na dang puer ao. Tongti aibelenertembo shinga mapu," ta Patras George-i ashi. "Tai tonglokja alirtem anema police-i First Information Report [FIR] ka benokogo, ajisüaka parnok nem jelia bail agütsüogo. FIR benokba sülen hopta ka jungogo saka tang tashi police-i onok kuli angadangtsü atema mejaoker," ta pai metetdaksü. "Iba yimdak Khristan 30 shi lir aser Khristan ajakji aayangertem dang lir, ibayongji onoki Muslim nunger ali kiburtem anema kecha meinyakteter. Khristan asübayong onok nem ochi temeden magütsür," ta paisa metetdaksü. Osangbener den jembidang Pakistan Masiha Millat Party Chairman, Aslam Sahotra-i, George'er kibongi ochi temeden angutsü atema onoki inyaktsü, ta metetdaksü. "Yimjak nung Wasif maaksütsüba dang masü saka pa indang Khristan maitsü raksatsü," ta Sahotra-i metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Teküpsar

(n) lokti aser yimten nung mangatettep adokdaksür (troublemaker)

* Teküpsar aliba yimti nung nisungtem putepa melitettsü.

Tekürang

(adv) tashi itita pungba-pubangaa aliba (physically fit)

* Tekürang nisungi kanga karaa asemtepteter.



Tir Yimyim

OLONG PAITEP # 7085

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPLÉN

- 1. Saku - (4)
- 6. Songjen - (7)
- 7. Mali/Tazüing - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzüngluden külemitsüker - (3)
- 17. Aso tila - (6)
- 20. Tashi maküm - (4)
- 24. Tenüing kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüingdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. _ _ _ tatsü - (3)
- 12. Tebur kidong aser zünga kasatsüingdajatepba - (4)
- 14. Pela agizükba tapu ka - (5)
- 15. Tenüing atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 7084 TELANGZÜBA

TIPLÉN :

- 2. Anükalem, 4. Mesak, 5. Apet,
- 9. Meimtep, 11. Posü, 12. Patak,
- 13. Tekettsü.

LANGTSÜNGLEN :

- 1. Kümdang, 2. Ayak, 3. Leptep,
- 6. Sati, 7. Yiar, 8. Sangküm,
- 9. Metsük, 10. Mazü.

NAI-A YA METETTER MA



Swedish stunt rider Magnus Carlsson-i "fastest handlebar-mounted wheelie" aser "longest distance ridden sitting backwards on a motorcycle" otsütem yangluteta Guinness World Records nung züluokogo.

Mizoram Chief Minister-i Mizo kintem longjemtsü ayongzük



Aizawl, March 7, 2025 (Agencies): Mizoram Chief minister Lalduhoma-i Mizo kin balala külemi longjemtsü ayongzükogo.

Mizo nunger benjung tulutiba 'Chapchar Kut' amongdang Mizo nungeri oboula nunger sobaliba aser inyaksangshi nem tetushi agüja longjemtsüla ta CM Lalduhoma-i ashi.

Mizo nungeri Hombar nungi tenzüka Chapchar Kut amonger.

Aizawl nung Assam Rifles ground nung benjungmong nung jembidang Lalduhoma-i 'Kut Pa' (father of the festival) ama shilem agia liasü.

Pai Mizo nunger oboula nunger talisa 'Hawihawmna' wazüka ayutsü ayongzük.

Nübortemi mapa tajung mesüra yimya tajung ajanga Mizo code of politeness (Hawihawmna) asentenshitsü atema CM Lalduhoma-isa ayongzük.

Linük nung aser bendanglen aliba 'Zofate' (all ethnic Mizo tribes) ajunga pei pei kin taginübatem toktsü Mizo linük ka ama longjemtsüla ta paisa ashi.

Chief minister Lalduhoma-isa lanuputu dang meranga inyaktsü aser state tejakleni anir aotsü ayongzük.

Iba benjungmong nung Fiji, Assam aser Nagaland nungi sobaliba yartsüingsangertemi shilem agia liasü.

Kangpokpi nung nisung 1 asü; KYKL züingsem ka apu

Imphal, March 8, 2025 (Agencies): Manipur kübok Kangpokpi district nung Honibarnü mepetmesü adokdang nisung ka asü aser 20 yirua lir.

Tanü nikongdang New Keithelmanbi nung alir arishi küm 32 tain Lalgouthang Singsit yirur mozü kidangi anir aodang len tom nung asü ta ketdangsürtemi ashi.

Gamgiphai nung security forces-i tenük amdaktsüba mokozü amshia noktandang L Singsit yiru. Iba tesem ya National Highway 102 nung lir aser Kuki-Zo nunger teimba ser

alir. Union Home Minister Amit Shah-i Honibar nungi Manipur nung NHs nung free movement tenzüka anema Kuki-Zo nungeri lungkak aita liasü.

Imphal airport nungi security temi meina passenger vehicles senzü tenzüka sülen Kuli lisopurtemi Gamgiphai area nung lenmang mokdanga liasü.

Idangji CRPF/CAF-i lenmang lapoktsü atema tenüing amdaktsüba mokozü amshi.

Singsit indang tasü mangji Kangpokpi district hospital indang mortuary nung yua lir.

Manipur - Myanmar arrtsülen Assam Rifles aser Manipur police-i Kanglei Yaol Kan-na Lup, (KYKL) züingsem ka apu.

Iba mapang security forces-i KYKL nung tanur ka anioaktsü merangba noktanga liasü.

Sepaitemi Border Pillar number 77 anasa KYKL züingsem Keisham Naocha (Ningsingba 38) apu. Pa ya Nongpok Sekmai nung alir.

Parnokisa Ningthoujam Sanjoy (18) ta ser tanur ka kümzük. Pa ya Bishnupur District kübok Potshangbam Mamang Leikai nung alir.

International Women's Day nung organs tenla agütsütsü nangzük

Guwahati, March 8, 2025 (Agencies): International Women's Day nüngtem nung Assam kübok Morigaon district nung alir tetsür kati la asüba sülen organs tenla agütsütsü nangzükogo.

Manipur village nung alir Manisha Rajkumari ya nija school tesayur ka lir aser bendanga agütsüba social worker ka lir. Lai la wadang aser kibong khuretem abenba den külemi azü tenlaba ajanga loktiliba yaria arur.

Tang tashi nung lai azü 18 ben tenlaogo aser nisung taküm aika kümzükogo.

Manisha-i azü tenlatsü jangraba ya la tanur asü dang timtem ajangshiba ajanga adokba lir. La class 4 nung azüingdang ta tetsü tashidak tamajung ka agi timtem aser azü



nüngdaka aküm. Ajisüaka, iba mapang azü tenlartem mengutet aser iba ya Manisha temulung nung tenoktenoka ayu. Lai akokba tashi medical emergencies nung yaritsü mulungteta liasü.

La kibong akümba sülena maneni azü tenlaa arur aser "Team Humanity" ta ajaba voluntary blood donation organization nung shilem agir.

International Women's Day 2025 nung lai la asüba sülen organs tenla agütsütsü tenangzükba agiogo.

Iba mapa tajung atema Morigaon Health Department-i Manisha nem organ donation pledge certificate ka agütsüogo.

Manisha Rajkumari-i blood donor ka nungi organ donor akümba ajanga nisung aika ajungmesotsü imlar.

Houthis teloki Israel amokmeren

Sanaa, Metsüremi/March 8 (Agencies): Yemen nung amendaker aliba Houthi teloki Gaza-i chiyongtsü, mozü aser tanga tenüngdakba osettem bener meyoki nokdanga aliba agintsü atema Israel nem anogo pezü atakzüktsüogo, ajita mesüra parnoki Israel anema "naval operations" tenzükshitsü ta amokmerenogo.

Iba takhangba ya Hokolbar aonung agütsü aser iba ajanga ano iba telok yagi Israel anema jenjang agishitsü akok ta tsübaa bilemer, shirnoki Gaza nung ceasefire benokba sülen Israel dak sendaka aliba rongtem aser Israel amakba anener lir.

"Onoki alima ajunga nem osang agütsür: Onoki ango pezü atakzüktsür," ta iba telok lenir Abdel-Malik al-Houthi-i video osang ka ajanga metetdaksü.

"Ken o jembitsürtem nem mapang agütsütsü atema iba mapang atakzüktsüogo. Anogo pezü sülen Israel-i maneni Gaza-i teyari meyoki crossings tem shibanga yura onoki Israel anema naval operations tenzükshitsü," ta pai ashi.

Israel-i Gaza amak tenzükba sülen Houthis, shirnok nem Iran-i teyari agütsür, parnoki Red Sea aser Gulf of Aden nung rongtem 100 ben dak temaben makogo aser ashiba agi, Gaza nung Palestine nunger pusema parnoki iba jenjang agir.

Iba mapang tsüingda parnoki rong ana tziyim telungi angema yokogo aser nisung pezü tepseta liasü. Iba ajanga company temi sen timba intokaka parnok indang rongtem Southern Africa ajanga senzüdaktsütsü telemtetba agia liasü.

Houthis purisa, missile aser drone amshia Israel kübok tesem balala makogo aser iba

mapang nisung ka tepset aser Tel Aviv nung school ka densema ki balala raksaja liasü.

Tir Donald Trump kübok United States-i iba hopta tetenzüklen Houthis telok ya tanaben kiralongrar telok ta sangdongogo.

Houthi teloki amokmerenba dak sendakba nung Israel-i kecha telangzüba magütsü.

Kasa mapang nung Hamas puri iba osang ya pelashishia agizükogo.

"Iba tasütait telemtetba agiba ya parnoki Gaza nung ita 15 tashi raraba mapang teyari agüja aruba atsülangshiba lir," ta Palestine nunger telok yagi ashi.

Houthis, shirnoki Yemen tuluba ka amokbanger lir, parnoki February ita ashiba agi, US aser Israel nati Palestine nungertem Gaza nungi tashiyim agi aninra parnoki military jenjang agitsü.

Israel-i Gaza-i teyari kecha meyoki anogo tenetbuba nokdanga ayuba mapang tang iba takhangba ya agütsüogo.

Iba tenokdangba ya March 2 nü nungi tenzüka agütsür lir. Ceasefire atema tenangzüktepba yangluba nungi Israel atsüingina mezüngbuba shilem taoba hopta tembangba sülen parnoki iba tenokdangba agüja liasü.

United Nations, rights groups aser linük balalai Israel-i tenokdangba agütsüba ya rara nung aibelen ka lir ta shia arudar.

Office of the High Commissioner for Human Rights (OHCHR)-i Hokolbarnü sangdong ka ajanga ashiba agi, Israel-i iba jenjang agiba ajanga Gaza nung oset jenjang kanga tasak kümogo aser nüburtem yatzür agi manenei meneptsü aser ano parnok maneni

amaktsü akok ta tsübua mesüngjemteti kümduaktsüogo.

Taoba hopta ana tsüingda kinü tanur ti temekong agi asüba indang health ketdangsürtemi metetdaksüba sülen iba tenokdangba ya agütsüogo, ya parnokisa metetdaksü.

Palestine nungertemi ashiba agi, tenokdangba agütsüba ajanga medical supply agi anünga kümogo aser mozükitem rara nung yirur alirtem anepalutsü atema timtemtepa arudar.

Al Jazeera osangbener Tareq Abu Azzoum-i southern Gaza nung Khan Younis nungi ashiba agi, tenüngdakba medical service tem agütsütsü atema healthcare workers temi takokba tashi inyakdar.

"Israel military-i Gaza amakba mapang yirur alir parnok 100,000 dak tema indang jembirba lir. Tang tenokdangba agütsüba ajanga totzü aser medical supplies ta ken o tongtibang ana dak sendakba nung tetsükdaktsü adokogo," ta pai ashi.

"Hospital aser medical centre tem nung service balala maneni agütsütsü atema medical team tem nem teyari agütsütsü asoshi totzü nüngdaker. Mozükitem timba emergency generator dak metaloker lir aser tang totzü bener meyoktsü atema tenokdangba agütsüba ajanga tensa tamajungba kümduaktsüogo," ta pai shisem.

Gaza rara nung Palestine nunger 48,440 süogo aser nisung 111,845 yiruogo. Ketdangsürtemi ashiba agi, asürtem ya 61,709 ajungtsü akok, kechiyong ano nisung meyirejang aika samar lir aser parnok ya sür alitsü ta amanger.

MOLUNGNEN O



20.03.1971 - 01.03.2025

Lar chirmur saker, aser la dang temoatsü ta ajar; la kinungpuia, la sanga ashir; "Tetsür aikati temsüa inyakogo, saka nai parnok ajak ajatetogo." ~Apijemtsu Shin 31:28-29

Onoki teti meima aliba asür Lt. S Amongla (Chuchuyimlang) shirangba anogo nungi asünü tashi, kidang kiyonger, yimer yimsanger, kinunger aser tembartem shirnoki ozü mangyim jashi anogo tashi nung aria bilema nübu, rongsen aser sarasadem agi nongita yariogo, ajak dang kangasa pelaba lemsateper. Nenok mapa tajung asoshi ozü kinungertemi tsüngdong arua pelaba meshitetaka, ozü mulungjang nung teti alitsü aser kodanga mamatsü. Ozüi meyipa agütsütsü kecha miliakasa Tulusang Tsüngremi nenok kija kibong tali moajang ta ozü tamang sarasadem

~Temeim, Kinungbo aser Chirmurtem

Ukraine anütoklen nisung 14 tepset



Kyiv, Metsüremi/March 8 (Agencies): Ukraine anütoklen tesem balala nung manger mesangwa tsüingda nisung 14 tepsetogo.

Ukraine indang emergency service-i Honibarnü ashiba agi, Russia nunger sepaitemi eastern Donetsk region nung Hokolbar aonung Dobropillia jila maka nisung 11 tepset aser 30 yiruja liasü.

Emergency services-isa, five-storey apartment buildings ti, administrative building ka aser gari 30 raksaja liasü, ta metetdaksü.

Kasa mapang nung Ukraine anütoklen Bogodukhiv, Kharkiv nung nüburtem aliba ki ka Russia nunger drone kati amakba sülen nisung asem tepset aser tenet yiruja liasü, ta Kharkiv governor Oleh Synhubov-i Telegram ajanga metetdaksü.

Odesa nung drone kati amakba sülen aluyimdang amshiba hadirtem bendena aliba tesem ka, service station building ka, auto parts store ka, kima yua aliba solar panel tem aser four-storey industrial building ka dak kongshia liasü.

Leningrad governor Alexander Drozdenko-i Honibarnü ashiba agi, Kirishi refinery nung Ukraine nunger indang drone ka khazüka yokba teraksa agi tank ka raksaja

Syria nung sorkar aser Assad pusemertem tsüingda mangatettep adok



Latakia, Syria nung Hokolbarnü security force talila yoker aliba noksa nung angur.

Damascus, Metsüremi/ March 8 (Agencies): Syria nung sorkar tasenba pusemertemi linük tzükümlen yimtsüing ishika maka aoba mapang nisung aika tepsetogo.

Toba tir Bashar Assad pusemertemi sorkari security forces amakba sülen iba jenjang ya agia liasü, ta war monitor kati ashi.

Yimtsüngtem ya Brehostibarnü nungi amak tenzük aser Hokolbarnüa maneni makogo. Assad-i aniba sorkar ya the Islamist group Hayat Tahrir al-Sham-i anir December ita tetenzüklen atsüngtokba sülen telok ana tsüingda tang

tamajungtiba raratepdar.

Küm 14 tashi linük civil war ajanga timtemba sülen Sorkar tasenba yagi Syria longjemduaktsütsü tenangzükba agütsüogo. Tang rara tenzükba sülen nisung 200 dak tema tepsetogo, ta Britain-based Syrian Observatory for Human Rights-i ashi.

Iba den bendenloksema mang ayangtsü atema yimtsüngtem maka aoba mapang nisung 140 tepsetogo, kong Syria sorkar sepai 50 aser Assad pusemer 45 densema lir.

Syria nung 2011 küm March ita nungi civil war tenzükba sülen nisung million tesadang ka süogo

aser million aika pei talidak ki toktsür jenshiaogo.

Sorkar pusemba sepaitemi Brehostibarnü Jableh yimti nung nisung ka aputsü merangba mapang Assad pusemertemi parnok medanga atar maka liasü aser iba ajanga mangatettep tenzük, ta Britain-based Syrian Observatory for Human Rights-i ashi.

Brehostibar aser Hokolbarnü sorkar tasenba pusemba sepaitemi Sheer, Mukhtariyeh aser Haffah yimtsüngtem maka ao aser tebur 69 tepseta liasü, saka tetsürtembo ka danga miyirutsü, ta observatory yagi ashi.

Nagaland Super League: Longtrok FC-i takok angu



Dimapur, Metsüremi/March 8 (Agencies): Nagaland Super League nung Honibarnü Chumoukedima Football Stadium nung Longterok FC aser Red Scars FC na asaya Longterok FC-i goal 1-0 agi kokogo.

Asaya mezüngbuba shilem nung minute 45 ya Longterok FC-i amokbanger asayar aser parnok rongnungi K. Asumi-i minute 8buba nung

mezüngbuba goal idakja liasü. Iba sülen parnoki goal idaktsütsü atema maongka aika yangluteta asaya saka midaktsütet. Red Scars FC puri defense kanga ajanga amen saka goal idaktsütsü atema maongka meyangluteti liasü.

Asaya tanabuba shilem nung telok anapronglai asaya akoktsü atema kanga toktepa asaya aser Red Hawks puri goal idaktsütsü atema maongka aiben angu aser

minute 46buba aser minute 56buba nung goal idaktsütsü atema metsüoktsüba ball post nung ondaka liasü.

Longterok puria Asumi aser Manton na ajanga goal idaktsütsü atema maneni nongshia asaya saka magütsütet. Asaya nung team anaprongla nung asayartemi foul-a aika mena-a asayar tatem nung goal ka yagi takoker bendanga liasü.

BNP Paribas Open: Swiatek, Pegula, Mirra nungeri takok angu

Metsüremi/March 8, 2025 (Agencies): Tang asaya aliba BNP Paribas Open tetsür kija asaya nung Hokolbarnü defending champion Iga Swiatek-i France tsür veteran Caroline Garcia 6-2, 6-0 agi kokogo.

Swiatek-i break points teku anguba nungi trokbo kokteta asaya aser la indang serve khien dang break südakja liasü.

Tetsür kija asaya nungsa Fourth-seeded America tsür Jessica Pegula-ia 6-4, 6-2 agi Poland tsür Magda Linette kokogo.

Tanga asaya ka nung arishi küm 17 tain Russia tsür Mirra

Andreeva, shiba taoba ita Dubai nung WTA 1000 champion tem rongnung tanutsütila aküm lai tanabuba set nung 0-4 agi tesülen aliba nungi meyipa tur France tsür Varvara Gracheva 7-5, 6-4 agi koka liasü.

Andreeva ya iba asayamung nung seed tekububa nung lir aser la tasembuba round nung Denmark tsür Clara Tauson den asayatsü, shiba lai Dubai final nung kokogo.

Tanabuba round asaya nung Tauson-ia 7-6 (7/3), 7-5 agi Colombia tsür Camila Osorio tsükdaktsü, shibai mezüngbuba round nung Grand Slam pezü koker alila Naomi Osaka

tsükdakja liasü.

Kasa asayamung tebur kija asaya nung America nunger Marcos Giron-i 7-6 (7/4), 3-6, 6-2 agi fourth seed Casper Ruud madak takok nguogo.

Russia nunger asayar Daniil Medvedev, shiba iba asayamung nung taoba küm ana tashi runner-up liasü, paia 6-2, 6-2 agi China nunger Bu Yunchaokete kokogo.

Ajisüaka tia maka tebur kija asaya nung world number two aser iba asayamung nung top seed asayar Alexander Zverev 4-6, 7-6 (7/5), 7-6 (7/4) agi Tallon Griekspoor-i tsükdaktsüogo.

CAF election nung tokteptsü atema CAS-i Eto nem temelaba agütsü



Samuel Eto

Metsüremi/March 8, 2025 (Agencies): Court of Arbitration for Sport-i Confederation of African Football (CAF) dang Cameroon football tekolakba Samuel Eto parnok indang executive committee atema candidate ka ama nodaktsü asoshi temelaba agütsütsü atema tetuyuba

agütsüogo. Confederation of African Football (CAF)-i taoba mapang African player of the year indang candidacy agizütsü memulungi liasü, shiba 2021 küm nungi Cameroon federation (Fecafoot) tekolak lir.

African federation atema election ya taruba hopta

general assembly ka agiba mapang agütsü renemer lir.

Arishi küm 43 tain taoba mapang Barcelona forward Eto, shiba Cameroonian sports ministry dena mangatetep adoker lir, pai iba telemteba anema saisapong indang okadak temaba nung ken o benoka liasü.

"March 12, 2025 nü CAF Extraordinary General Assembly Meeting agiba mapang CAF Executive Committee election agütsü aliba atema Mr Samuel Eto candidates tem indang list nung züngoksemsü atema CAF Executive Committee nem tetuyuba agütsür," ta Lausanne nung amendaker aliba Court of Arbitration obendang nung shia lir.

Eto ya CAF vice-president mapa atema tokteptsü asoshi tejangraba lir, ta Cameroon nung source kati ashi.

Taoba mapang City, Sevilla striker Alvaro asayanungi anener

Metsüremi/March 8, 2025 (Agencies): Spain nunger striker Alvaro Negredo-i pa football asaya nungi anisüngzütsü atema telemteba agiba Brehostibarnü sangdongogo.

"Football dang kanga pelar," ta pai social media nung lemsatepba video ka nung ashi. Video nungsa pa asaya nungi anisüngzütsü temaitsü pai hook ka nung boots ka Hidaka ayuba nguogo.

Arishi küm 39 tain taoba mapang Sevilla, Manchester City aser Valencia forward ya taoba season tembangba sülen club ka nunga danga dena maliasü. Taoba season Real Valladolid pur La Liga-i promote asüba mapang pai club

nem teyari tulu agüja liasü.

Negredo-i, Man City nungi asayaba mapang Premier League aser League Cup kokogo. Pa 2013-14 season nung Man City nung oa aden aser iba sülen Valencia-i loan nung oa liasü.

Alvaro Negredo ya Euro 2012 akokba Spain team nung densema liasü, aser pa iba asayamung nung anaben asayaogo.

Negredo ano Turkey nunga Besiktas nungi aser Premier League nung Middlesbrough nungia asayaogo. Club balala nungi asayaba mapang pai asaya 755 nung goal 290 idaktsü aser Spain team nungi 21 ben asayaba mapang goal 10 idaktsüogo.

Mohammad Amir-i IPL nung asayaner

Metsüremi/March 8, 2025 (Agencies): Pakistan nunger pacer Mohammad Amir-i ashiba agi, pa 2026 küm Indian Premier League (IPL) nung asayatsü atema temsüa akümtsü aser maongka dang ngura asayatsü mulunga lir.

"Taruba küm tashi nungbo ni IPL nung asayatsü atema maongka angütsü aser maongka dang agütsüra kechiba magütsü," ta Mohammad Amir-i "Haarna Mana Hai" show nung shilem agiba mapang ashi.

Amir kinungtsü Narjis ya UK senso lir aser pa-a UK passport angütsü imla atadar, aser iba ajanga pa IPL nung asayatsü atema lenmang lapoktsütsü.

Show indang host Tabish Hashmi-i Amir dang, IPL nung asayaba atema Pakistan nung pa aitsüba mapang pai kechi telangzüba agütsütsü ta asüngdang.

Amir shiba international cricket asaya nungi anener lir, pai tenüng metetshi-i ashiba agi, "Pakistan nunger cricket asayartem IPL nung asayatsü memelar, saka taoba mapang cricket asayartem commentator aser coach ama inyakogo."

Amir-i, taoba mapang Pakistan captain Wasim Akram shiba Kolkata Knight Riders (KKR) team coach liasü aser Ramiz Raza shiba commentator liasü tena tetshia jembiba liasü.

Amir-isa, pai Virat Kohli kanga akümtsübur aser Kohli-i pa nem 2016 küm Kolkata nung Twenty20 World Cup asayaba



Mohammad Amir

mapang pa nem agütsüba bat kanga pelashishia amshidar ta ashi. "Virat ya asayar tajung ka aser pa sempet ni nükshir," ta pai ashi.

"Virat-i kü nem pa indang bat agütsü aser ni kang pela liasü. Pa batting amenba yimya ni nükshia aruogo aser paia ni bowling aonba nükshia aruogo. Ni pai agütsüba bat amshia asaya kar nungbo kanga junga asayaogo," ta pai ashi.

Mohammad Amir-isa, pai RCB nungi asayaner ta ashi.

Iba show nung külemi shilem agisang Ahmed Shehzad-ia, Amir RCB nung adenba ajanga parnok tia melenshitsü akok aser mezüngbuba IPL title dangi anitsü akok, ta ashi.

BILEMDANGANG

"Merangdanga inyakertem atemabo takok ajakiji tangazükba tajung dang lir."